

DOMENIE XXVI «VIE PAL AN»

Antifone di jentrade Dn 3,31.29.30.43.42

Signôr, dut ce che tu nus âs mandât tu lu âs fat seont une sentence vere;
o vin pecjât cuintri di te, no vin ubidît ai tiei comandaments;
ma cumò dai glorie al to non e tratinus seont la ricjece dal to boncûr.

Colete

Diu, che tu palesis la tô plui grande fuarce
cuant che tu perdonis e tu âs dûl,
fâs risinâ cence polse sore di nô la tô gracie,
par che o corin viers di ce che tu âs imprometût
e o spartin cun te l'ereditât dal cîl.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Nm 11,25-29

Sêstu gjelôs par me? Fossino ducj profetis tal popul!

Dal libri dai Numars

In chei dîs, il Signôr al dismontà tal nûl e al fevelà a Mosè: al cjolè il spirt che al jere parsore di lui e lu sborfâ sui setante anzians. Cuant che il spirt si poia parsore di lôr, chei a tacarin a profetâ cence podêsi fermâ. Però doi oms, un di non Eldad e chel altri Medad, a jerin restâts tal campament e il spirt si poia parsore di lôr; a jerin di chei notâts ma no jerin saltâts fûr par lâ te tende; si meterin a profetâ tal campament. Un fantaçut al lè a contâi il fat a Mosè e i disè: «Eldad e Medad a son che a profetin tal campament». Alore Josuè, fi di Nun, che di frut in sù i veve fat di famei a Mosè, i disè: «Mosè, paron, improibissural!». Ma Mosè i rispuindè: «Sêstu gjelôs par me? Fossino ducj profetis tal popul dal Signôr e magari che il Signôr ur des a ducj il so spirt!». Peraule di Diu.

SALM RESPONSORIÂL dal Salm 18

R. La leç dal Signôr e je la nestre gjonde.

La leç dal Signôr e je perfete, e rinfuarce l'anime.
La testimoneance dal Signôr no mole:
ur dà sintiment ai piçui. R.

La perauale dal Signôr e je monde e e dure par simpri:
i judizis dal Signôr a son vêrs e juscj dal prin al ultin;
plui che no l'aur a valin,
plui che no un disordin di aur dal plui rût;
a son plui dolç che no la mîl e di un pietin che al gote. R.

Cun dut che si lasse indreçâ di lôr il to famei
e al à dut ce vuadagnâ tal metiju in vore,
i fai cui ju capissial?
Di ce che o ài fat di mâl, tu smondeimi. R.

Soredut de supierbie ten vuardât il to famei,
che a paronâ sore di me no rivi;
alore o sarai mont
e cence pecjât di sorte. R.

SECONDE LETURE Jc 5,1-6

Lis vuestris ricjecis si son fraidessudis.

De letare di san Jacum apuestul

Cumò, vualtris siôrs craçait e berlait pes disgraciis che a stan par plombâus! Lis vuestris ricjecis si son fraidessudis, i vuestris vistîts ju àn roseâts lis tarmis, il vuestri aur e il vuestri arint a son consumâts dal rusin, e il lôr rusin al fasarà di testimonî cuintri di vualtris e al glotarà lis vuestris cjars come un fûc. O vês ingrumâts tesauris pai ultins dîs! Ve, che la pae che ur vês robade ai lavorents che a àn seselât tai vuestris cjamps e berle, e i berlis dai seseladôrs a son rivâts fin tes orelis dal Signôr des schiriis. O vês salacât in chest mont e si sês passûts di vois, si sês sglonfâts pe di dal fruç. O vês condanât e copât il just e lui nol pò fâ cuintri.

Peraule di Diu.

CJANT AL VANZELI cf. Zn 17,17

R. Aleluia, aleluia.

La tô peraule, Signôr, e je veretât:
fasinus sants tal to bonvolê.

R. Aleluia.

VANZELI Mc 9,38-43.45.47-48

Chel che nol è cuintri di nô al è par nô. Se la tô man ti è di scandul, çoncjile.

Dal vanzeli seont Marc

In chê volte, Zuan al rispuindè a Jesù disint: «Mestri, o vin viodût un che al parave fûr i demonis tal to non e jal vin improibît, parcè che nol ven cun nô». I rispuindè Jesù: «No vês di improibîjal, parcè che nol è nissun che al puedi fâ un miracul tal gno non e subito dopo che al puedi fevelâ mâl di me.

Di fat chel che nol è cuintri di nô al è par nô.

Chel che us darà di bevi ancje dome una tace di aghe intal gno non, par vie che o sês di Crist, us al dîs in veretât che nol pierdarà la sô ricompense.

Chel che al varà scandulizât un di chescj piçui che a crodin in me, al sarès miei par lui che i picjassin tor dal cuel une muele di mulin e al fos butât tal mâr. Parcè che, se la tô man ti è di scandul, çoncjile! Al è miei par te jentrâ mancin inte vite che no lâ cun dutis dôs lis mans te Gheene, vadî intal fûc che no si distude. Se il to pît ti è di scandul, çoncjilu! Al è miei par te jentrâ çuet inte vite che no jessi butât cun ducj i doi i pîts te Gheene. Se il to voli ti è di scandul, gjavilu! Al è miei par te jentrâ cuntun voli sôl tal ream di Diu che no jessi butât cun ducj i doi i vôi te Gheene, là che il lôr vier nol mûr e il fûc no si distude».

Peraule dal Signôr.

Su lis ufiertis

Diu di misericordie,

danus la gracie che cheste nestre ufierte ti plasi
e nus spalanchi la risultive di ogni benedizion.

Par Crist nestri Signôr.

Antifone a la comunion cf. Sal 118,49-50

Impensiti, Signôr, de peraule che tu i âs dade al to famei,
tu mi âs dât parie ancje la sperance;
chest mi à dât confuart te mê miserie.

O ben: 1 Zn 3,16

Di chest o vin cognossût l'amôr di Diu:

lui al à dade la sô vite par nô;

par chel ancje nô o vin di dâ la nestre vite pai fradis.

Daspò de comunion

Il misteri dal cîl che nus ristori, Signôr,
te anime e tal cuarp, par spartî inte glorie l'heritât
di chel che o partecipin a la sô passion e o proclamìn la sô muart.
Lui che al vîf e al regne tai secui dai secui.